

四庫全書

史部

欽定四庫全書

史部

續資治通鑑長編卷四十八

詳校官檢討臣劉錫五

刑部郎中_臣許兆椿覆勘

纂修官編修_臣周興岱

謄錄監生_臣陳遂

謄錄監生_臣黃洲

欽定四庫全書

續資治通鑑長編卷四十八

宋 李燾 撰

真宗

咸平四年春正月甲戌德音降死罪以下囚杖罪釋之
殿前都指揮使河西節度使范廷召有疾辛巳上親臨
問之及卒贈侍中廷召善騎射在軍中踰四十年由顯
德以來凡親征未嘗不從也

甲申以右正言知制誥趙安仁知審刑院時有將校笞所部卒死議致大辟安仁以軍中之令非嚴不整遂獲免死詔應益州軍民因賊亂殺傷劫盜除官吏外皆釋不問時訴訟連結頗難閱實故悉許其自新也中外官上封事者甚衆詔樞密直學士馮拯陳堯叟詳定利害以聞

乙酉遣使瘞西川遺骸

戊子封歸義節度使曹延祿為譙郡王

甯錄云加歸義節度使檢校太

尉今從會要及本傳
於是始封王爵也

庚寅知河南府武勝節度使贈侍中李至卒其三子皆
遷秩授官給俸終喪至好賢樂善為學精力然嚴剛簡
貴人士罕得遊其門性吝嗇仕既通顯盡逐李存審養
子而取其貲財娶妻預出郡告身納采之日送其家為
識者所嗤或曰至為參知政事辭位不受祿制行甚高
逐養子預納妻封告蓋毀之或損其真也

此據隆平
集所言

撫水蠻酋蒙漢城等二十三人來朝納標槍鐐刀四十

餘事賜錦袍銀帶器幣有差甲午各授以官

己亥秘書丞查道上言曰朝廷命轉運使副不惟商度錢穀蓋亦廉察郡縣庶臻治平以召和氣今觀所至或未盡公蓋無懲勸之科至有因循之弊望自今每使回日先令具任內曾薦舉才識者若干奏劄貪猥者若干朝廷議其否臧以為賞罰從之 以棣州防禦使石保興知澶州保興在澶州每捶人輒令緩其杖移晷方訖上聞之謂左右曰如此用刑無乃太酷乎亟戒諭之

宗正卿趙安易翰林學士梁周翰上新修屬籍三十三
卷唐末喪亂屬籍罕存無所取則周翰創意為之頗有倫貫
上召西川轉運使兵部員外郎馬亮入朝問以蜀事蜀
自雷有終既平賊黨誅殺不已亮所全活踰千人城中
米斗千錢亮出廩米裁其價人賴以濟及至京師會械
送為賊所誑誤者八十九人知樞密院事周瑩欲盡誅
之亮言愚民脅從者眾此特百分一二爾餘皆竄伏山
林若不貸此反側之人聞風疑懼一倡再起是滅一均

生一均也上悟悉宥之二月加直史館復遣還部時諸州鹽井歲久泉涸而官督所負課繫捕者州數百人亮盡釋之而廢其井又除蜀部舊逋官物二百餘萬 秘

書丞劉炳以屢陳時務召對崇政殿翌日遷太常博士

劉炳
未見

丙午詔廣南諸州先命幕職州縣官權知自今並命京

官

丁未兵部郎中直昭文館韓援等八人分詣岳瀆祈雨

戊申交州黎桓遣使貢馴犀象 屯田郎中楊覃上言

春初方盛時雨稍愆輦轂之下繫囚望詔有司未得論

決死罪竢降雨乃復常典又請凡決重囚日減膳撤樂

以應古義且彰至仁之德焉

此事不知其月日
今附見慮囚之前

癸丑上御崇政殿親慮繫囚死罪再詳覆之餘悉從輕

因召宰相李沆等對于殿之西閣至午而罷又遣庫部

員外郎程渥等乘驛分詣諸路疏理繫囚杖以下皆釋

之

程渥
未見

甲寅以宋州隸京東路 宰臣李沆等以旱表求罷不許

乙卯鹽鐵使張雍言温州板稅場吏逋高額錢二百萬詔除之

丁巳幸大相國開寶天壽寺上清宮祈雨戊午雨自去冬早上每御蔬食憂憫切至是日方臨軒決事雨沾衣左右進蓋却而不御

壬戌樞密直學士馮拯陳堯叟上言請令羣臣子弟奏

補京官或出身者並試讀一經寫家狀以精熟為合格從之秘書丞知金州陳彭年上疏曰夫事有雖小而可以建大功理有雖近而可以為遠計者臣請言之其事有五一曰置諫官二曰擇法吏三曰簡格令四曰省官員五曰行公舉此五者實經世之要道致治之坦塗也夫置諫諍之官開獻替之路堯舜湯武所共然也何者以正直之臣忠信之士參立左右專奉箴規有事必言有闕必諫足以達四方之壅蔽資聖主之聰明今雖

有諫官且無言責或出居外任或兼領餘司常箝口以自安少危言而替否是同虛器何補聖猷臣請依六典員數置諫議大夫司諫正言並選孤立無黨忠直不欺言行相符名實相稱者為之俱以才授不以叙遷使其常立朝廷專居諫署入觀朝政出聽輿詞或作事失中或出令未當或遷舉無狀或獄訟有冤小則上章大則廷諍然後陛下察其所言可者從之否者罷之歲終以言事之多少為課最之高卑忠謹盡規者甄升依阿固

位者懲責自然人皆竭節政必無邪臣下不敢偷安朝廷得以震肅矣又人命所繫在於法官官或非才人必無告古者按大獄議大刑雖本於法律亦輔以經義故釋之定國之為廷尉則無冤人張湯趙禹之列九卿乃名酷吏今國家重文學之選輕刑法之司故其屬僚未得盡善用忠恕之道則為曠官徇深刻之文乃名奉法唯格律而是守豈經義之能詳若是則囹圄何由空虛鈇鎖何由偃息臣請今後廷尉官屬咸委所司慎加銓

擇不拘資叙唯擢才能使其理一成之刑務於平允用
三宥之法志在哀矜無以愛憎舞文無以高下希旨自
然民知恥格時洽和平又法令者國家之權衡生民之
銜轡貴於簡易惡乎滋章久用則民知適從數變則人
無所措近者陛下知制勅之頻降懼條科之太繁旋軫
聖謨特令刪定既經歷之者皆是名臣則措置之間固
皆合理而詔書頒下方及踰年後勅施行又將累百或
刪去者重為條貫或已有者更示申明無益憲章徒繁

簡牘且理遵畫一則吏無以欺民令或頻更則人得以
弄法損益之際豈不明哉古人有言利不十不變法誠
為此也况先朝求理之心陛下繼明之志詔令一出夷
夏同歡縱少有於闕文亦無妨於大體豈煩改作以致
多門臣請今後有上封言事請變格法者非有大益無
改舊章庶使號令愈明刑辟漸措又理世之端審官為
本審官之道用賢為先不在具員但期得俊故曰官不
必備惟其人又曰省事不如省官今國家州郡至廣官

員太多無益公方空蠹國用使有才者莫盡其力不肖者得容其姦請以臣所親經證其利害臣前任蘇州通判日知州喬維岳疾病獨臣與判官崔端共事次任壽州通判日知州喬維岳喪亡支使甘鴻漸差出獨臣與推官陸文偉同官此時區分獄訟行遣文書皆得及期亦無闕事即今蘇州知州通判外有職事官三員壽州知州通判外有職事官四員官既衆事益煩增將吏之衙參添簿書之擁滯又臣本州洵陽縣計戶一千一百

有官三員率皆人戶彫疎路岐荒僻詞訟絕少租賦甚微徒使安閒固無勤績臣每見支郡推官軍監判官並名初等職事然有名雖支郡而事倍藩方額是軍監而務多州府或當要路或在邊陲其間支郡則有推官而關判官軍監則有判官而無通判監當錢穀詳斷刑名凡所責成莫非繁劇然其請受少於判司勞逸不均賢愚共見臣請特選明幹朝臣與諸路轉運使相度管內州縣有公事簡少官屬過多處並量減省以所減之奉

依司理司法參軍例添給初等職事則冗長之處既已減員要用之官又各加俸自然官無虛設人皆竭誠創此新規益光至理又為邦之道莫切於求賢求賢之方莫先於公舉然隄防不峻則濫進之路興憲綱稍嚴則明揚之典廢期臻多士在振宏綱臣請依唐朝故事新授常參官朝謝日並進狀舉官自代各隨所長具言其狀或以文學或以吏能或以強明或以清白務存據實不許飾詞儻所諳知無避親黨既經御覽即付宰司俟

至年終具名條奏在外者委諸路轉運在京者委本司
官長更審其能以驗所舉如薦揚既數採聽非虛即與
量才各加進用其後或不修操行故黷彝章則舉主依
法科刑以懲繆舉或政績殊異課最有加則舉主隨事
旌酬以褒進善賞罰既信清濁自明蓋采羣議則人無
以私有常規則衆皆知勸清原正本其在於茲臣又伏
見唐太宗常召公卿諮詢理體羣臣多拘近俗莫有遠
謀獨魏元成請行王道文皇既從其議果致太平中華

則外戶不扃四夷則重譯來貢艱難屢作而締構益新
豈非盛德在人餘慶及後所致歟以陛下之德夸越古
先誠宜鄙晉魏而不談小高光而獨出行清淨神明之
化恢仁義慈儉之風然後舞干戚以為甲兵畫衣冠以
為刑辟建明堂而朝萬國登岱宗而禮百神則天下之
民無聲而應海外之俗不召而來矣疏奏詔馮拯陳堯
叟參詳之拯等上言竊詳往制常參官及節度觀察防
禦刺史少尹畿赤令并七品以上清望官授訖三日內

於四方館上表讓一人以自代其表付中書門下每官
闕則以見舉多者量而授之今緣官品制度沿革不同
伏請令兩省御史臺官尚書省六品已上諸司四品以
上授訖具表讓一人自代於閣門投下方得入謝在外
者授訖三日內具表附驛以聞仍報御史臺其表並付
中書門下籍名每闕官即取舉多者以名進擬如任用
後顯有器能明著績用其舉主特與旌酬不如舉狀者
即依法科罪如讓表不到委閣門御史臺糾督以聞其

上封言事請變格法者望自今令中書樞密院送審刑院刑部大理寺詳議仍照驗前後格敕儻須至改革即具聞奏更委中書樞密院詳酌施行並從之上因謂輔臣曰自今諫官宜精擇其人

甲子三司都催欠司引對逋負官物人上親辨問凡七日釋二千六百餘人蠲所逋負物二百六十餘萬已經督納而非理者以內庫錢還之身歿者給其家舍人院上重詳定百官封贈條制詔從之凡現任將相在朝正

一品及任中書樞密院官特遣封三代依舊外應東宮
一品以下雖曾任將相只依編勅本品追封其三代曾
祖母祖母除中書門下二品及平章事在朝正一品
使相封國太夫人外餘只封郡太夫人止如舊有國號
者依舊追封其位極將相勲業崇高薨謝之時特恩追
封王爵依舊外如因子孫追贈雖曾任將相並不許封
王除祖父先居高位累贈至一品外如子孫官高祖父
官卑已贈五品者須歷品贈官方得贈至正一品母妻

所封郡縣依本姓望封封國者不拘此限 太常寺言
樂工習藝匪精每祭享郊廟止奏黃鍾宮一調未嘗隨
月轉律望示條約乃命翰林侍讀學士夏侯嶠與判寺
郭贄同按試擇其曉習月令者悉增月俸自餘權停廩
給再俾習學以獎勵之雖頗振紀綱然亦未能精備蓋
樂工以年勞次補不以藝進至有抱其器而不能振作
者故難於驟變云

丙寅詔學士兩省御史臺五品尚書省諸司四品以上

於內外京朝幕職州縣官及草澤中舉賢良方正能直言極諫各一人不得以見任轉運使及館閣職事人應詔

十朝綱要得查道王暉等

禁民間造銀鞍瓦及金線又禁盤蹙

金線

已已改河東權鹽院為永利監 詔應外州官吏奏民

間利病實封者進奏院即時進入不得拆封

會要二月事

是月從知黃州王禹偁之請令諸路置病囚院持仗劫賊徒流以上有疾者處之餘悉責保于外

此從本志與實錄不同據

實錄則去年四月已置病因院

詔京百司人吏並不得放免下戶差

徭科配戶部舊有蠲符案主百司人吏蠲免差配給蠲符自此廢之其諸州先貢蠲符亦免

三月癸酉樞密院言準例春季金明池習水戲開瓊林苑縱都人遊賞又大宴于含元殿上以太宗忌月命有司討詳故事以聞史館檢討杜鎬等引晉荀訥唐王及善韋公肅所議以為禮有忌日無忌月其春宴及上巳金明池苑並合舉樂從之

甲戌撫水蠻酋蒙英等三十六人來朝輸兵器毒藥誓
不犯邊並加錫賚授官有差

乙亥詔史館修撰韓援等各舉御史臺推勘官

丁丑京師及近畿諸州風雪上謂宰相曰霾曠頗甚蓋
陰陽不和人事所召朕甚憂畏卿等更思闕政以佐予
治李沆等再表求罷免不許

辛巳詔分川峽轉運使為益梓利夔四路益州路總益
綿漢彭邛蜀嘉眉陵簡黎雅維茂永康凡十五州軍梓

州路總梓遂果資普榮昌渠合戎瀘懷安廣安富順凡
十四州軍監利州路總利洋興劔文集壁巴蓬龍閬興
元劔門三泉西縣凡十五州府軍縣夔州路總夔施忠
萬開達渝黔涪雲安梁山大寧凡十二州軍監 兵部
尚書張齊賢上言終南山處士种放守道遺榮孝行純
至棲遲衡泌歷二十年願以備賢良方正之舉乃賜放
詔及裝錢五萬令京兆府遣官詣山備禮發遣放辭疾不至
先是三院御史多有出外任者風憲之職或用他官兼

領乃詔本司長吏自薦其屬俾正名而舉職壬午以太常博士張巽為監察御史從新制也

張巽未見

膳部郎中

兼侍御史知雜事范正辭上言治民之官牧宰為急今舉屯田員外郎吳蒨等五人堪知大郡復請令蒨等於前資見任京官令錄判司司理參軍簿尉內各舉知縣縣令三人從之

吳蒨未見

甲申并代州都部署步軍都指揮使彭信節度使高瓊來朝召之也先是范廷召桑贊所將邊兵臨敵退衄有

上封請罪之者上以問瓊瓊對曰兵違將令於法當誅然陛下去歲已釋其罪今豈宜復行之又方屯諸路非時代易恐衆心疑懼乃止尋命瓊為殿前都指揮使工部尚書贈右僕射張宏卒

己丑宴射後苑上言及大射投壺鄉飲酒之禮因命直館各賦射宮詩上歡甚詔羣臣極飲恕其沉醉凡節序賜宴則宗室禁軍大校牧伯諸司使皆令習射

庚寅左僕射呂蒙正兵部侍郎參知政事向敏中並守

本官平章事中書侍郎平章事李沆加門下侍郎初
乾元厯氣朔漸差詔判司天監京兆史序等考驗前法
研覈舊文取其樞要編為新厯於是厯成來上賜名儀
天命翰林學士朱昂為厯序頒行之修厯遷秩改服章
賜帛有差

辛卯兵部侍郎參知政事王化基罷為工部尚書化基
任中書不以蔭補諸子官然能訓導皆有所立以給
事中同知樞密事王旦為工部侍郎參知政事樞密

直學士馮拯陳堯叟並為給事中同知樞密院事

禮部郎中薛映兵部員外郎梁鼎左司諫楊億並知制誥上初欲用著作佐郎直集賢院梅詢命中書召試映鼎及詢等宰相李沆素不喜詢言于上曰梅詢險薄用之恐不協羣議上曰如此則何人可沆曰楊億有盛名上乃驚喜曰幾忘此人仍以億望實素著但召映鼎就試翌日與億並命

會要云至道二年四月梁周翰不召試而授知制誥其後薛映梁鼎楊億

陳堯佐歐陽修亦如此例據映鼎皆召試會要誤也

以國子監經籍賜潭州岳

麓山書院從知州李允則之請也先是放天下逋欠錢物既而三司計可督責及尚須究問本末縲繫追逮頗為煩擾至有久被拘者於是命知制誥薛映梁鼎與三司按籍詳定具名引對上臨軒閱視多蠲除之

壬辰御史中丞趙昌言知雜御史范正辭上言內宴更衣百官有徑歸其家及過從於外者臣等昨於春宴前嚴行戒勵雖稍整肅然將期久遠望降敕文自今有違者乞委外彈奏從之

丁酉上謂宰相呂蒙正等曰中書事無不總賴卿等宿望副朕意焉凡事無固必惟擇善而行以漸蘇天下之民最為急務也呂蒙正等言備邊經費計臣之責近者但委轉運使至於出入盈虛之數計臣或不能周知此甚無謂也乃下詔申警三司令舉其職儻闕誤必正典刑御史中丞趙昌言奏近例臺司多遣人吏巡察請依故事令左右廵使各領其職踰越法制者具名以聞從之

夏四月乙巳以保州刺史楊嗣莫州刺史楊延朗並為
本州團練使北作坊使綉州刺史無棣張凝為趙州刺
史南作坊使高州刺史李繼宣為西上閤門使領康州
刺史上謂宰相曰凝舊事太宗藩邸猶有稱其才者嗣
及延朗並出疎外以忠勇自効朝中忌嫉者衆朕力為
保庇乃及於此繼宣雖不逮二三輩然亦熟邊事不易
得也時嗣與延朗並為緣邊巡檢勇於戰鬪以名稱相
上下邊人謂之二楊先是上特召嗣入朝面授團練使

嗣言臣久與延朗聯職一旦驟居其上願且守舊官上
嘉嗣之退讓即命延朗亦為團練使仍令嗣持告命就

賜之

楊延朗傳云三年冬敵復來寇延朗伏銳兵於羊山西自北掩擊且戰且退及西山伏發敵衆大敗

獲敵將函首以獻追團練使與楊嗣並命又王漢忠傳云敵大寇中山漢忠率諸將陣於野未戰敵遁追斬甚衆獲其貴將加殿前副都指揮使按上去年春自大名還京師至今年春契丹傳會要本紀實錄並不載敵復入寇事其復入寇乃四年冬不知延朗及漢忠所獲敵將果在何時延朗與漢忠同獲一人或各獲一人皆不可知也據楊嗣傳乃因嗣讓初不緣破敵有功而漢忠為殿前副都指揮使據實錄本紀則與高瓊葛霸同遷亦不言獲敵將於中山也疑延朗及漢忠所獲敵將當是二年冬及三年春上在大名時或四年冬事二傳誤

載耳今
皆不取

丙午以馬軍都指揮使感德軍節度使葛霸為并代
行營都部署

丁未以吏部員外郎陳省華為鴻臚少卿時省華子堯
叟權任樞密故特優寵之

戊申詔諸路幕職州縣官罷職待遷食貧可憫自今至
年終替者宜並放選依例擬官

辛亥詔秦州太平監所籍主吏柳延義等背產悉還之

初延義等專主銀冶歲輸定課更三歲虧常額者四萬二千餘兩有司盡籍其家財以償上憫之故有是命

壬子審官院初引對京朝官於崇政殿遷秩有差京朝官磨勘引對自此始上既用孫何耿望等議罷郊祀進改乃命審官考其課績優劣臨軒黜陟之凡三年差遣受代皆引對多獲進改罕有退黜由是官籍寢增云

此據

本志
當考

詔京朝官及吏部選人親老無兼侍者特與近

任

丙辰西川輝和爾汗王祿勝遣使曹萬通來貢玉鞍勒
名馬寶器等萬通自言任本國樞密使本國東至黃河
西至雪山有小郡數百甲馬甚精習願朝廷命使統領
使縛繼遷以獻即授萬通左神武大將軍降詔獎祿勝
優賜器服

十一月未又
入貢當考

丁巳上以四郊所取桑葉麥苗示輔臣曰觀此足知歲
事矣

己未翰林學士王欽若使西川還對于崇政殿即日以

欽若為左諫議大夫參知政事 初王均連陷綿漢勢

張甚彭州人謀殺兵馬都監以應之時晉江陳從易實

為軍事判官攝州事斬其首謀者召餘黨曉以禍福赦

之衆皆伏悅乃率厲將吏嚴守械戒其家僮積薪舍後

曰吾力不足以守當死於此賊聞有備不敢入境於是

王欽若以狀聞召從易為著作佐郎

召從易不得其月
日今附見欽若使

還時更
須詳考

曹國公元儼將出閣上親錄朝臣數人姓名

擇可使輔導元儼者以監察御史張巽純謹乃命為屯

田員外郎曹國公翊善 知益州雷有終轉運使馬亮

等上言准詔詳度毀本州羊馬城壕利害竊以郡國城隍其來久矣蓋所以聚民而防他盜也本州頃歲李順之亂賊自外攻即日而陷此城池頽圯之致也去歲王均之叛姦由內作經年自固此城池完緝之咎也然而理亂之事雖繫于人亦關冥數誠非常情所可預測况此城頃因蠻寇民受塗炭至唐天成三年節度使孟知祥遂謀創築若緣軍賊誠合去除又慮異時寇盜外攻

請仍舊不毀從之

先是上以西蜀遼隔事有緩急難於應援故分四路別置官屬又慮漕輓者各司其局失均濟之義庚申命知益州右諫議大夫宋太初兼川陝四路都轉運使

上以朝臣外任代還寓於逆旅癸亥置朝集院於朱雀門凡百餘區尋復罷之王欽若等請川陝縣五千戶以上並置簿尉自餘仍舊以尉兼簿從之

丁卯詔川峽幕職州縣官並二年與替

辛未上御崇政殿試制舉人命翰林學士承旨宋白等充考官得秘書丞查道進士陳越入第四等定國軍節度推官王曙入次等以道為左正言直史館越將作監丞曙著作佐郎越尉氏人曙河南人績之後也

五月壬申朔御朝元殿受朝德音降京畿流罪以下囚杖罪釋之

癸酉以曹國公元儼為平海節度使

甲戌詔定州都部署王顯兼河北諸州都轉運使應供

軍金帛芻糧並同經度其餘刑獄公事止令轉運使副
施行先是轉運使耿望行部至定州顯與宴數勸望酒
望素有風裁且不能多飲固拒之顯不悅徐曰它日望
都自當飲耳望都契丹兵衝也凡元帥出軍轉運使隨
軍給饋餉疾徐惟元帥之命轉運使往往得罪故顯語
及之望它日入奏從容具白其事上默然良久曰卿第
去勿憂朕自有處分於是命顯兼都轉運使之職顯遂
不能委罪於望云

此據祖宗獨斷然獨斷乃以此事為
太宗所處蓋年月差誤耳今改之按

耿望以二年四月丙子為京西漕是年五月甲午為河北漕後甲戌益二十日先是固未嘗行北邊也恐獨斷誤又六月庚辰再命王顯領都漕王超副之不知甲戌已命顯六月庚辰又命顯何故或止一命而實錄誤故兩出之當考耿望事姑載初命顯時

庚辰翰林學士吏部郎中知制誥朱昂罷為工部侍郎致仕昂有清節淡於榮利初為洗馬十五年不遷不以屑意及在內署非公事不至兩府上知其素守故驟加褒進昂累章告老上不得已從之遣使就第賜器幣謂大臣曰昂侍朕左右未嘗以私事干朕今其歸老可給全

俸詔本府歲時省問如有章奏許附以聞又命其子正
辭知公安縣使得就養舊制致仕官止謝殿門外於是
上特延見命坐勞問久之令候秋涼上道復遣中使錫
宴於玉津園兩制三館儒臣皆預仍詔賦詩餞行恩渥
之盛近代無比

甲申上覽囚簿自正月至三月天下斷死罪八百人懽
然動容謂宰相曰雜犯死罪條目至多官吏儻不盡心
豈無枉濫故事死罪獄具三覆奏蓋其重慎也自何代

罷之遂命檢討沿革終慮淹繫亦不果行

乙酉詔三班自今差使臣知縣勿以先為諸州牙吏及富民受職者充從陝西轉運使劉綜之請也

丙戌御史臺言曹州民蘇莊出兵器匿亡命剽民財產小不如意必焚其廬舍積贓計四十萬請籍其家上曰暴橫之民國有常法籍之斯過矣可論如律 高州蠻向君猛遣其弟君泰來貢方物

戊子以殿中侍御史卞袞為淮南轉運使仍命袞與本

路轉運副使劉師道同領淮南江浙荆湖制置茶鹽礬稅都大發運事時王子興上表求代詔令自擇其人子興以袞及師道名聞故有是命袞震之子也至道末罷發運使及子興兼淮南轉運使尋加都大而不立使名發運使自後並淮南轉運使兼領其務省發運使在至道三年四月子興以制置茶鹽兼淮南漕在咸平三年八月其加都大發運不見於實錄據會要在四年今附此景德三年二月仍復使名

上以鹽鐵使張雍齷齪小心三司事重宜有裁制庚寅命戶部使王嗣宗代為鹽鐵使雍在三司置簿籍有案前急馬前

急急中急之目頗為時論所誚其出典藩鎮務裁節宴
犒聚公錢為羨餘以輸官帑集會僚佐糲食而已度
支員外郎王子與為右諫議大夫充戶部使上封者
言三司官吏積習依違天下文牒有經五七歲不為裁
決者案牘凝滯吏民抑塞水旱災沴多由此致自今請
委逐部判官呈覆向來諸路州軍所申請及本司所積
滯事疾速與奪然後詣判使會議別白施行如更有稽
滯即許諸路轉運使及本州軍聞奏命官推鞠以警弛

慢乃詔同知樞密院事馮拯陳堯叟舉常參官幹敏者
與三司使議減冗事及參決滯務拯等請以秘書丞直
史館判度支勾院孫冕同領其事詔陝西歲稔穀價
甚平宜遣使市糴務廣邊備以息轉餉乃命兵部員外
郎董龜正乘傳與本路轉運使經度之

辛卯以吏部侍郎陳恕知道進銀臺封駁司恕言封駁
之任實給事中之職隸於左曹雖別建官局不可失其
故號請為門下封駁司隸銀臺司從之

甲午河北都轉運使光祿少卿劉錫卒上曰錫居漕輓
之職以勤劬集事而不任威刑亦可嘉也錄其長子為
秘書省正字賜其幼子出身

欽定四庫全書

續資治通鑑長編卷四十九

宋 李燾 撰

真宗

咸平四年六月辛丑朔詔以近畿數郡春雪損桑令京
朝官分往察視蠲其正稅其緣科等物無令折納絲帛
士寅命知制誥梁顥薛映共詳中外章疏

癸卯太常丞直集賢院梅詢上言邇者朝廷遣使減省

天下冗吏今三司摠括諸路計省十九萬五千八百二人惜費養民足資治本請付史館從之

己酉殿中丞直史館樂黃目上言曰從政之源州縣為急親民之任牧宰為先今朝官以數任至知州簿尉以兩任入縣令雖功過易見而能否難明臣欲望自今審官院差知州銓曹注縣令候各及三二十人一次引見依唐開元二年故事於御前試時務策一道察言觀行取其才識明於吏理達於教化者充選其有不分曲直

罔辨是非者或黜之釐務或退守舊資如此則官得其
人事無不治矣上頗嘉其好古然不果行黃目史子也
庚戌上溪州刺史彭文慶等來貢方物

先是京朝官授遠地及緣邊知州通判朝辭日許升殿
時多有以細務干聽覽者士子始令奏聽朝旨得報乃
許升殿

癸丑以兵部郎中史館修撰韓援為秘書少監知洛陽
縣援擢置史館才數月自以年迫遲暮乞知西京赤縣

為歸休之計上憐而許焉

甲寅詔諸路轉運使副自今薦舉官屬當歷任無贓私罪及條其績効以聞異時擢用不如舉狀者連坐之
丁巳詔東川民田先為江水所汎者除其賦從王欽若之請也

初黃州境二虎鬪其一死食之殆半羣鷄夜鳴經月不止仲冬震雷暴作知州刑部郎中王禹偁手疏言之且引史記天官書洪範五行傳為證上亟命中使來驛勞

問醮禳之又詢於日官言守土者當其咎上惜禹偁才
名即命徙知蘄州至未逾月卒戊午訃聞上甚嗟悼之
厚賻其家賜一子出身禹偁詞學敏贍時所推重丰裁
峻厲以直躬行道為已任遇事敢言雖履危困封奏無
輟嘗云吾若生元和時從事於李絳崔羣間斯無媿矣
又為文著書師慕古昔多涉規諷以是不容於流俗故
累登文翰之職尋即罷去焉

庚申上謂輔臣曰軍國之事無鉅細必與卿等議之朕

未嘗專斷卿等各宜無隱以副朕意也

壬戌停修江州廬山太平興國觀常州張公山洞靈觀以旱故也

丙寅對兵部尚書張齊賢于崇政殿凡數刻

丁卯詔諸路州縣有學校聚徒講誦之所並賜九經

戊辰出陣圖示宰相上曰北戎寇邊常遣精悍為前鋒若扞禦不及即有侵軼之患今盛選驍將統領別為一隊遇其奔衝彼既挫銳而退餘則望風不敢進矣敵又

好遣騎兵出陣後斷糧道可別選將領數萬騎殿後以備之 初田錫知泰州幾三年不得代錫乃上章自陳即詔歸闕屢召對言事嘗奏曰陛下治天下以何道臣願以皇王之道治之舊有御覽但記分門事類臣願抄略四部別為御覽三百六十卷萬幾之暇日覽一卷又采經史要切之言為御屏風十卷寘宸坐之側則治亂興衰之事常在目矣上善其言詔史館以羣書借之仍免其集賢校讎之職每成數卷即先進內錫言臣所撰

書每五日具草一卷檢討舛互寫為淨藁已七八日大率十年絕筆臣慮朝廷俾臣泣事或委一郡授一職不若使臣常以皇王之道致主於堯舜也陛下春秋鼎盛好古不倦若師皇王之道日新厥德十年之內必致太平臣雖衰邁得見其時私幸足矣即先上御覽三十卷御屏風五卷手詔褒荅之

按田場集五月八日召對請修書二十六日進草藁降詔

獎諭不得其時
今附見六月末

秋七月庚午朔詔河朔餽運勞民斯甚今轉運使差減

徭役勿致流徙

壬申丹流眉國主多預機遣使打古馬副使打臘判官
剗皮泥等九人來貢方物其國東北距廣州百三十五
程自是始通也

甲戌以左侍禁閣門祇候焦守節為閣門通事舍人故
事閣門無通事舍人通事舍人隸中書省其長一人判
四方館謂之館老如抽赴閣門祇應者則兼稱閣門祇
候今直授閣門通事舍人始更舊制矣

天禧二年十
二月可考

丙子封劍州梓潼神濟順王為英顯王初王均反王師
攻成都忽有人登梯衝呼曰梓潼神遣我來九月二十
日城陷爾輩悉當夷戮賊衆射之倏忽不見果及期而
克於是守臣以其狀聞故有是命

已卯邊臣言契丹謀入寇以山南東道節度使同平章
事王顯為鎮定高陽關三路都部署天平節度使馬步
軍都虞候王超為副都部署殿前副都指揮使保靜節
度使王漢忠為都排陣使殿前都虞候雲州觀察使王

繼忠為都鈐轄西上閣門使韓崇訓為鈐轄顯仍兼定州超鎮州漢忠高陽關都部署

庚辰詔王顯領河北都轉運使王超副之王繼忠韓崇訓同其事超初赴行營顯候于郊外超下馬望拜上聞之以為將帥有讓甚嘉焉

乙酉申命諸州禁競渡令太常禮院定禡祭儀付王顯等

戊子知審刑院趙安仁判大理寺韓國華議刑失中命

戶部侍郎張雍知制誥梁顥代之

甲午契丹主子耶律隆慶下內四友班首兼北宮都博
田鳳容及其弟從壽來降補鳳容為三班奉職恩賜有
差

戊戌斬三司軍將趙永昌永昌素凶狠無行督運江南
所為多不法知饒州韓昌齡廉得其贓狀及違禁事移
於轉運使馮亮坐決杖停職遂擢登聞鼓訟昌齡與亮
訛謗朝政仍偽刻印作亮等求解之狀詔下御史臺鞫

問上察其詐引於使殿臨訊之仍召前饒州錄事叅軍
楊傑證其事永昌屈服遂戮之釋亮不問而昌齡以他
過貶郢州團練副使中外之人仰上明斷罔不相賀

韓昌

齡楊傑
未見

己亥以會州刺史伽裕勒為保順郎將蘓家族齊都爾齊白
馬族密香威伊特族多香並為安化郎將 詔淄青齊州
及河北經蕃寇蹂踐處貢舉人許免取解

先是江浙荆湖廣南遠地應強盜及持仗不死者并部

其屬至京師多殞於道路是月詔自今止決杖黥面配所在五百里外本城

八月庚子朔蠲陵州崇楊等六井逋鹽三萬四千斤

李繼遷遣其牙將來貢馬猶稱所賜姓名然抄刼邊部益甚上以邊臣玩寇朔方餉道愈艱辛丑命兵部尚書

張齊賢為涇原儀渭邠寧廊延保安鎮戎清遠等州軍

安撫經略使知制誥梁顥副之即日馳騎而往

齊賢本傳云清

遠軍陷乃命齊賢出使蓋誤矣賊陷清遠在九月二日此時未也

石隰州副都部署唐州刺史王杲受詔部軍儲赴河西
逗撓不進壬寅責授千牛衛將軍

丙午大風上遣健步於近郊取禾穗視之皆無所傷

實錄

載是日蠲潭州民所負牛租已並書
在三年李允則被獎語時今不復出

戊申上出環慶清遠軍至靈州地圖指示輔臣曰一昨
戎人所掠部族邊臣奏不以實又指靈州西榆林大定
曰戎人多據此路憑高以瞰王師蓋恃負遠難於追襲
復指天澗路曰楊瓊嘗言此路往靈州險而有水可保

無患然將帥顧方略如何耳又曰邊臣奏糧儲芻粟大有備呂蒙正曰國家貿易商賈以實邊農人不擾而西鄙足用蓋上策也

己酉復親試制舉人得成安縣主簿丁遜舒州團練推官孫僅入第四等並為光祿寺丞直集賢院秘書丞何亮懷州防禦推官孫暨入第四次等以亮為太常博士暨為光祿寺丞遜湖州人也

遜湖州人
據登科記

壬子上觀稼北郊宴射於含芳園都人望見乘輿扈躍

稱萬歲呂蒙正曰車駕遊幸百姓歡呼如此物情不可
強致蓋陛下臨御五年務行仁卹所以中外感悅上曰
下民但不擾之自然快樂蒙正又曰今秋大稔太平無
事時和年豐即為上瑞上曰朕以邊事未寧勞民供饋
蓋不獲已也苟能選將練兵驅攘戎寇使不敢侵掠則
近邊之民亦獲安泰矣咸平初太常丞陳堯佐為開
封府推官坐言事切直貶潮州通判潮去京七千里民
俗鄙陋堯佐至州修孔子廟作韓愈祠堂率其民之秀

者使就學時張氏子年十六與其母濯於惡溪為魚所噬堯佐以謂昔韓愈患鱷之害以文投溪中而鱷為遠去今復害人不可不除卒使捕得更為文鳴鼓於市而戮之潮人以比韓愈三歲召還獻詩數百篇大臣亦稱其文學於是命直史館

歐陽修墓碑云堯佐貶潮其所言事蓋人臣所難言者不知何

事當考據堯佐集戊戌冬貶潮州戊戌咸平元年也

甲寅御史中丞趙昌言奏近者審刑院大理寺斷事乖當其主判既已罷絀詳斷官亦宜別加慎擇自今復然

者請嚴示懲罰授以遠官又天下大辟斷訖皆錄款聞
奏付刑部詳覆用刑乖當者並加按劾惟開封府未嘗
奏案或斷獄有失止罪原勘官吏而知府判官推官檢
法官皆不及責則何以辨明枉濫表則方夏望自今如
外州例施行從之昌言又請凡有罪被問不即引伏者
許令追攝詔先以聞

己未直史館劉蒙叟獻宋都賦述國家受命建號之地
宜建都立祖宗之廟上嘉納焉命史館檢討故事以聞

甲子職方員外郎祕閣校理丹陽吳淑上言諸路所納
閏年圖當在職方收掌近者並納儀鸞司伏以天下山
川險要皆王室之秘奧國家之急務故周禮職方氏掌
天下圖籍又詔土訓以夾王車漢祖入關中蕭何獨收
秦圖籍由是周知險要豈可忽而不顧哉請令以今閏
所納圖並上職方又州郡地理犬牙相入向者獨畫一
州地形則何以傳合他郡望令諸路轉運使每十年各
畫本路圖一上職方所冀天下險要不窺牖而可知九

州輪廣如指掌而斯在從之

丙寅李繼遷率衆攻清遠軍知軍劉隱監押丁贊等分

兵拒守

隱贊俱未見

上以巴蜀遐遠時有寇盜丁卯命戶部員外郎直史館
曾致堯太常博士王勗供備庫使潘惟吉通事舍人焦
守節分往川峽諸州提舉軍器察官吏之能否致堯誤
留詔書於家惟吉教致堯上言渡吉栢江舟破亡之以
自解致堯曰為臣而欺其君吾不忍為也乃上書自劾

釋不問其後惟吉入見禁中道蜀事具言致堯所以自

劾者上嗟嘆久之惟吉美弟之子也

王昷未見王鞏雜記云潘惟吉乃周

世宗子太祖不殺令美養之此事甚美當考詳附載

是月陝西轉運使劉綜請於蒲洛河建城為軍上曰比亦有獻此議者然既立城郭又須屯兵屯兵不多寇來不可出戰止於閉壁自守則軍城之立未見其利也宰臣呂蒙正曰聖慮所及深得理要願罷其請從之三司置拘收司以判磨勘司官兼領之

九月己巳朔詔鎮定兵馬分屯近地以省糧運時課者
言敵猶在炭山未遽南牧故也 知封駁司陳恕請鑄

本司印詔如有封駁事取門下省印用之因遂改知封
駁司為兼門下封駁事

庚午清遠軍都監段義踰城叛降于李繼遷

段義未見

癸酉環州言蕃族威布等先為李繼遷所掠今徙帳來

歸詔給近地閑田處之 慶州言地再震 太子中舍

張宗誨獻屯田論三篇召試舍人院賜進士及第宗誨

齊賢子也

先是上遣使諭旨於靈環清遠十州軍駐泊副都部署
郝州觀察使楊瓊曰賊若寇清遠及青崗白馬寨即合
軍與戰於是繼遷頓積石河長圍清遠清遠屢走間使
詣瓊請濟師瓊將悉出兵為援鈐轄內圍使馮守規都
監崇儀使太原張繼能曰敵近重兵在前則後無以繼
不可畢往乃止命副部署海州團練使潘璘都監西京
左藏庫副使劉文質率六千人赴之且曰伺我之繼至

瓊頓慶州逗留不行乙亥繼遷親鼓其衆攻清遠南門

其子阿伊克攻北門堙壕橋以進城遂陷時瓊又遣鈴轄

尚食使嚴州刺史李讓

李讓未見

領精卒六百人赴之已不

及矣賊踰支子平泊清崗城下瓊與守規繼能始出師

其行甚緩及聞清遠陷益怯賊進至望梅原知環州西

京左藏庫副使順州刺史王懷普

懷普未見

巡青崗寨謂瓊

曰此寨水泉遠不可多屯師師少即不可守願棄之瓊

等相與合謀焚糧廩芻積兵仗驅寨中老幼以出瓊即

退師保洪德寨賊勢浸盛未嘗與交鋒也

清遠軍陷是此月七日其

它皆附見蓋不得其的日故也

或言永興軍副部署齊州團練使濮人錢守俊老病不任職壬午召為左領軍衛大將軍以國子監校勘官

前知永年縣劉士元為大理寺丞南宮侍教南宮北宅

有侍教自此始

本志云大中祥符二年又有侍教之名按劉士元已見於咸平四年九月矣本

志或誤也大中祥符二年二月又命李頌時大雅為南北宅侍教非事始矣劉士元未詳邑里

丙戌翰林學士承旨宋白等上新修續通典二百卷詔

付秘閣仍賜宴以勞之賜器幣有差其書重複猥穰大為時論所非卒不傳布上尋欲改作亦弗果也

先是詔國子祭酒邢昺等校訂周禮儀禮公羊穀梁傳正義丁亥昺等上其書凡一百六十五卷命模印頒行賜宴國子監並加階勲於是九經䟽義悉具矣江南轉運使馮亮言舊敕犯銅禁者七斤而上並處極法奏取勅裁多蒙減斷然待報踰時頗成淹緩請別定刑名以為永制詔自今滿五十斤以上奏裁餘遞減之

戊子以除名人胡旦為通州團練副使旦自流所遇赦至闕下頗不檢慎故授以冗秩

己丑知寧州石熙政上言昨清遠軍失守蓋朝廷素不留意因請授兵三五萬上曰西北邊事朕何嘗一日忘之今熙政所言蓋外任不知耳宜賜詔獎其敢言知樞密院事周瑩等曰陛下求理從諫憂邊卹民之心雖童穉亦當知之至於城壘失守乃將帥非才耳熙政豈得如此悖慢上曰儻罪之則人誰敢言矣

庚寅詔陝西民家出一丁號保毅軍給資糧與正兵分

戍守城壘遣御史吳蘄與轉運使同主其事凡六萬八

千七百九十五人其緣邊軍士先選中者並升為禁軍

號保捷

咸平元年初置秦州極邊保毅事見年末吳蘄奏所得保毅數實錄在明年正月己酉今并書

辛卯麟府卓羅副部署曹璨率熟戶兵邀擊李繼遷輜

重於唐龍鎮西柳撥川殺獲甚衆生擒其大校四人

冬十月己亥朔上謂呂蒙正等曰選衆求材誠非易事

朕常孜孜詢訪冀有所得向來於軍校中超擢八九人

委以方面其間王能魏能頗甚宣力陳興張禹珪亦稱
有聞蒙正等曰才難求備今拔十得五有以見陛下知
臣之明也王能定陶人時知靜戎軍魏能時知威虜軍
陳興衛南人時為石隰州部署禹珪嘗歷洺瀛霸三州
兼鈐轄鐸之子也

禹珪今任考之弗得因
具載所歷更須檢詳耳

上語近臣

曰近者慶州地再震昨司天奏熒惑犯輿鬼秦分野當
有災宜戒邊將以靜鎮之且上天垂象示戒惟慮不知
今既知之可不恐懼修省知樞密院王繼英曰妖不勝

德上曰朕何德可恃同知樞密院陳堯叟曰天文謫見
實欲昭示時君楚莊王懼無災政恐其獲罪于天弗容
自警耳今陛下克已愛民常慮一物失所河防十餘溢
而不決歲復大稔此聖德格天所致也上曰天不欲困
生靈耳豈朕德能感之自此益須防慎如荆湖比年艱
食災沴滋甚尤可卹也上又曰自清遠軍失守遂屯兵
於洪德寨常憂其暴露原野薪芻乏少屬使臣自彼來
言環慶今茲大熟薪芻尤賤差慰意也

知益州宋太初與鈐轄楊懷忠不協上以蜀土始安慮其臨事矛盾癸卯徙知秦州馬知節代之亟召太初還先是秦州嘗質羗酋支屬二十輩殆踰二紀知節始至悉遣還且曰此亦人也豈不懷土乎蕃落感其惠訖受代無犯塞者小泉銀坑鑛久不發而歲課不除主吏破產備償猶未盡知節三奏其事得請蠲之仍許以日收為額

丙午徙鎮高陽闕前陣鈐轄趙州刺史張凝為邠寧靈

環慶等州副都部署悉召楊瓊等付御史按其罪

丁未張齊賢梁顥自陝西經略安撫還對于便殿齊賢

上言曰

齊賢所上疏不知其時因使還附見理或當然也

昨者清遠軍陷沒以

來青崗寨燒棄之後靈武一郡援隔勢孤賊遷必窺覘
城池劫脅熟戶兵力傷沮難固壘垣況塞北未寧方有
調發若果分兵西面亦恐兩失機宜以今日西鄙事勢
言之窮討則不足防遏則有餘其計無他在激勵自來
與繼遷有讎蕃部招誘遠處大族首領啗之以官爵誘

之以貨財推恩信以導其誠述利害以激其志若山西
蕃部響應遠處族帳傾心則兇醜之勢減矣以弓箭手
及旋點義軍對本城兵士臣所領十二州軍有二萬餘
人若更於他州及近處對替又合得五六千人其本城
兵士試加料揀亦甚有材勇可扞邊者若緣邊兵得及
五萬餘更誘蕃部踰十數萬但彼出則我歸東備則西
擊使其奔命不暇矧更能外侵哉仍許蕃漢兵獲得馬
畜貨財悉令自取明行曉諭遠近皆知則蕃漢將士之

心孰不見利爭進今靈州軍民不翅六七萬陷之死地
艱危可知臣又慮賊遷謂來春必發兵救援靈武於我
未舉兵之際盡驅虵豕併力攻圍則靈州孤城亦必難
固萬一陷失賊勢益增縱使多聚兵草廣積財貨亦難
保必勝矣所以臣乞封博囉齊為六谷王及厚賜金帛
仍先敦諭彼必嚮風恐遷賊旦暮用兵斷彼族賣馬之
路苟朝廷信使得達博囉齊則尼瑪族西南遠蕃不難
招輯西蕃既已稟命緣邊兵勢自雄則廊延環慶之淺

蕃原渭鎮戎之熟戶自然齊心討賊竭力聖朝設能與對替兵甲及駐泊軍馬互為聲援伺間而興則萬山聞之必不敢於靈州河西頓兵矣萬山退縮則賀蘭山蕃部亦稍叛遷賊矣如此則靈州孤壘未至憂虞今議者謂六谷美名終宜吝惜靈州孤壘翻未籌量與其濫賞而收羌夷之心臣謂濫賞之失輕矣苟若感地而稔豺狼之勢則感地之恥大矣今議者不過曰名器不可假人刑賞不可濫及此乃聖人治中國之道非議於羌人

者也陛下即位之初以銀夏一管盡與繼遷委高爵於匪人屈王臣於穹帳分儲廩以悅其志輦金帛以慰其心有以見陛下愛全生靈恥用凶器惠此中國以綏四方者也朝廷於遷賊之恩可謂厚矣殊不知契丹慮遷賊感大國之恩斷右臂之勢防患所切其謀甚深署王爵以賜之遣戎使以鎮之王爵至則旌節之命輕矣戎之命適所以資之也戎使至則動靜皆伺之向背之心異矣我使往適所以堅之也夫西平之命亦虛名也契

升命之有何損哉以今日言之當時之策豈不為失乎
且六谷者西北之遠蕃也羌人之內推為雄豪若計平
時但以市馬須示羈縻則一懷化將軍亦已厚矣酌今
日事體似失權宜兼恐今後邊地事更有準前失中即
於國家大有妨損昨清遠之陷是使姦兇轉成豐富兵
民官吏六七千餘或含恨重泉或永囚異域傷和致殄
思之痛心顧惟靈州還同甯獸外則虞寇戎之過內則
憂變故之生朝夕之間垂餌虎口然而握兵者畏懦逗

留坐觀覆敗運籌著安然自若曾不憂遼臣雖至愚不勝忠憤且羌人之性變詐多端必恐醜類之謀潛伺間隙伏望明諭邊將內備外虞臣不任憂國思報之至

齊據

賢疏稱契丹西平之命然則繼遷蓋嘗受契丹封冊矣而史不載當考按遼史聖宗本紀八年十二月遣使

封李繼遷為夏國王十五年三月己巳夏國破宋兵遣使來告己卯封夏國王李繼遷為西平王事在太宗至

道三年三月距真宗即位前十五日

錄故靈州懷遠鎮駐泊借職李贊

子重貴為殿直重寶為借職拾得為殿侍先是贊為李繼遷所圍本鎮戍兵數不滿百拒戰累日食盡力竭積

藁自焚而死上憐之故有是命仍厚賜其家

贊未詳邑里國史亦

無傳忠義泯沒者
固多矣可不惜哉

己酉張齊賢上言請募江淮荆湖丁夫八萬以益戍兵
廣邊備上曰此不唯動搖人心抑又使南方之人遠戍
西鄙亦非便也遂寢其奏

庚戌上以陝西二十三州圖示輔臣歷指山川險易蕃
部居處又指秦州曰此州在隴山之外號富庶且與羌
戎接畛昨已命張雍出守冀其綏撫有方也次復指殿

北壁靈州圖曰此馮業所畫頗為周悉山川形勝如此
安得知勇之士為朕守之乎又指南壁甘伊涼等州圖
及東壁幽州已北契丹圖上曰契丹所據地南北千五
百里東西九百里封域非廣也而燕薊淪陷深可惜耳
甲寅北面前陣鈴轄張斌與契丹遇于長城口時積雨
敵弓用皮弦皆緩濕斌擊敗之殺獲甚衆漸近戎首伏
騎大起三路統帥未及進前陣兵少退保威虜軍

張斌未見

七月己卯初以斌為定州副都部署不知
何時改前陣鈴轄也豈代張凝者乎當考

利州言戍

兵三十三人謀叛伏誅

乙卯以西涼府六谷都首領博囉齊為鹽州防禦使兼
靈州西面都巡檢使初知鎮戎軍李繼和請授博囉齊
刺史仍賜廩給張齊賢又請封為六谷王兼招討使靈
州西面都巡檢使竢其立功則授之節鉞上命宰臣議
其事咸曰博囉齊已為首帥況藉其戮力共討繼遷儻
授以刺史則名品太輕未付節旄而加王爵則典制非
順招討使號不可假於外夷請授防禦使俾兼都巡檢

之職從之仍以殿直閣門祇候李振辭假崇義使為加

恩官告使

李振辭
未見

己未以西涼府六谷左廂副使結布伊朗布領宥州刺
史又以其多囉族首領褚實奇等三人並為懷化將軍
時西涼使入朝且言六谷分左右廂伊朗布為左廂副
使促勒錫卜為右廂副使朝廷所降符命伊朗布專掌之
實叅博囉齊戎事上方務招懷故申命焉 詔高陽關
三路兵增騎二萬為前鋒又命將五人各領騎三千陣

于先鋒之前別命步軍副指揮使莫州駐泊都部署桑贊領萬人居莫州順安軍為奇兵以備邀擊馬步軍都軍頭北平寨駐泊部署荆嗣領萬人以斷西山之路仍列繪為圖遣內侍副都知閻承翰齎示王顯等且戒之曰設有未便當極言以聞無得有所隱也


辛酉上得張斌捷奏初議以大兵陣於威虜軍會謀者言契丹猶未動故命悉徙于中山已而敵騎遽入漁陽漸逼威虜斌雖以前鋒獨克大兵訖不進討上甚歎息

焉

癸亥詔莫州駐泊都部署桑贊分部下兵萬人屯於寧
邊軍令北面前陣兵居其後上以前陣昨經力戰故休
息之也

甲子知雄州何承矩請於乾寧軍選銳兵乘刀魚船自
界河攻平州以分敵勢從之 詔三司官屬議軍儲經
久之制吏部侍郎陳恕監之 主客司員外郎直集賢
院李建中言太清樓羣書恐有謬誤請選官重校上因

閱書目見其闕者尚多仍詔天下購館閣遺書每卷給
千錢及三百卷者當量材錄用建中洛陽人也



欽定四庫全書

史部

續資治通鑑長編卷五十一

詳校官檢討_臣劉錫五

刑部郎中_臣許兆椿覆勘

纂修官編修_臣周興岱

謄錄監生_臣黃洲

欽定四庫全書

續資治通鑑長編卷五十

宋 李燾 撰

真宗

咸平四年十一月壬申知階州竇玘獻白鷹詔還之
詔諸司非言要切事無得升殿當取旨者具狀以聞時
諸司事無巨細悉升殿取旨上以為臣僚自有職分不
當如是會秘書丞孫冕上章極論其不可故降是詔

上謂侍臣曰昔漢武事邊逞一時之志不顧中國疲弊誠不足慕然訖孝宣世天下無事四夷請吏亦其餘威之所及也

丙子王顯遣寄班夏守贊馳騎入奏前軍與契丹戰大破之殲二萬餘人獲其偽署大王統軍迪里相公等十五人首級并甲馬甚衆餘皆奔北號慟滿野

按張斌長城口之捷

乃十月十六日甲寅其二十三日辛酉斌奏始到其二十日癸亥何承矩又奏偵得契丹自威虜軍為王師所敗殺偽署大王統軍二人蕃軍僅二萬人餘衆號慟于野按此即長城口之捷也其十一月九日丙子王顯

又奏十月十六日前軍與契丹戰大破之戰二萬餘人
獲其偽署大王統軍迪里相公等十五人首級得偽印
二以羽林軍為大牧中馬甚衆首領遁去按顯稱十月
十六日其日則甲寅也所稱前軍則張斌實前陣鈴帽
所稱殺戮二萬人又與何承矩所奏數同偽署大王統
軍名號亦同但顯奏稱獲十五人首級承矩止二人數
特異承矩得於傳聞或未詳盡理無足怪獨疑張斌先
已奏捷而王顯又別奏且月日太遲緩當時必有故惜
乎史不能載耳是役也王顯全師實屯中山未嘗出顯
奏十月十六日之捷亦專指前軍據本傳顯又上表待
罪此可見破敵者非顯全師明矣契丹傳既於十月載
長城口之捷又於十一月載王顯等全師至大破敵恐
緣捷奏兩上故誤
分為兩事今不取

先是保州團練使楊嗣莫州團練

使楊延朗西上閣門使李繼宣入內副都知秦翰並為

前陣前鋒鈴轄分屯靜戎威虜軍及是會師於威虜延
朗嗣輕騎先赴羊山繼宣與翰分左右隊各整所部翰
全軍亦往繼宣留壁齊羅止以二騎繼進至則延朗嗣
適為敵所乘繼宣即召齊羅之衆與翰軍合勢大戰敵
走上羊山繼宣逐之環山麓至其陰繼宣馬中矢斃凡
三易乘進至羊山谷大破之延朗嗣初頓齊羅既而退
保威虜繼宣獨與敵角薄暮始至威虜

按此則張斌既捷於長城口繼

宣等又捷於羊山王顯所奏豈專指此乎然亦與張斌同日此可疑也姑附見顯捷奏後更徐考之楊延朗傳

以羊山之捷為三年冬則
其誤審矣辨載四月初

戊寅宰相率百官稱賀

捷奏以初九日到羣臣後兩日乃稱賀當由旬假故稍遲一日

耳

上與宰相議威虜功狀呂蒙正曰昨日止前陣與

前鋒血戰而退始陛下廟算防秋於前陣之後排先鋒

策先鋒乃布大陣犄角而進苟邊臣偵候無差遵守成

算則王師克敵必倍往古屬大陣猶在中山前陣先鋒

已至威虜秦翰等聞賊在西山勇於先登率兵而出遇

戎首偕來殺戮雖衆然違陛下本旨臣等衆議望未行

賞典上曰見賊不俟大陣前驅陷敵亦可賞也詔北面陣亡軍士官為收瘞仍厚卹其家王顯上言先奉詔令於近邊布陣及應援北平控扼之路無何敵騎已越亭障今前陣雖有尅捷恐未贖違詔之罪上慮顯憂懼即降手劄慰獎之

己卯秘書丞直史館孫冕上言茶鹽之制利害相須若令江南通商賣鹽緣邊折中糧草在京納金銀錢帛則公私皆便為利實多今若便施行即南中州軍且令官

賣商人既已入中候其換交引往亭場川路脩退風波阻滯計須二年以上方到江潭未到間則官賣鹽課已倍獲利及其全集稍侵官賣之額然以增補虧於官無損况三路官賣舊額止百三十萬貫臣計在北所入已多在南所虧至少舊額錢數必至增盈其淮南禁鹽有長江之限但嚴切警巡明立賞罰則官賣鹽課必不虧懸設使淮南荆湖通商之後官吏怠慢或至年額稍虧則國家以折中糧草贍得邊兵以中納金銀實之官庫

且免和雇車乘差擾民戶冒涉凜寒經歷遐遠借如荆湖運錢萬貫淮南運米千石以地里斤脚送至窮邊則官費民勞何啻數倍又言臣所上通商放鹽為公私之利者有十而橫生疑沮者有三詔吏部侍郎陳恕等議其事恕等上議曰江湖之地素來官自賣鹽禁絕私商良亦有以蓋由近煮海之地息犯禁之人官得緡錢頗資經費且江湖之壤租賦之中穀帛雖多錢刀蓋寡每歲買茶入榷市銅鑄錢准糧斛以益運輸平金銀以充

貢入乃至京師便易南土支還贍用之名實藉鹽錢以助居常廣費猶或聞闕今若悉許通商則必頓無儲擬未有別錢備用鹽法詎可更張且變制改圖事非細故若匪官鹽住賣則又私商不行即令住賣官鹽立乏一年課額況行商算畫必務十全豈有江湖官猶賣鹽邊塞私肯入粟假令敢入私物獲請官鹽首初運到江湖必須官私競貿既而官價高大私價低平多糶商鹽則官鹽不售並依官價則私價太高公私兩途矛盾不已

則官利失而私商困矣況不住賣而望商人入中藁粟者未之有也既入中藁粟而望課利不虧者亦未之有也向者淮南通商亦於邊上折中一歲之內入數甚微糧則不及萬鍾草則都無一束近者陝西鹽法亦令納結資邊一年之間數亦無幾全亡實驗但有虛名江湖若放通商淮南亦須撤禁三處既私商雜擾兩浙必官鹽流離透漏浸淫禁不可止乍變易則江湖為首終柰亂則淮浙相兼大失公儲莫救邊備施於今日恐未協

宜從之

先是職方員外郎秘閣校理吳淑上疏請復古車戰之法辛巳淑又言臣以車戰之利自古有之故衛青李陵田豫馬隆及漢光武與敵戰皆用車而勝近事符彥卿破敵陽城亦以拒馬為行寨因大風出不意開拒馬出騎兵掩擊之惟天寶祿山之亂房琯於潼關陳車以戰遂致敗績蓋狹隘之地非用車之所也夫匈奴所長者騎兵也必須平遠曠野雲布霧散馳逐往來士卒前無

所依後無所據故蕃騎雷動颺至易致退縮苟非聯車以制之則何以禦其奔突哉故用車戰為便其制取常用車接其衡軛駕以牛布為方陣四面皆然東西鱗次前後櫛比車上置槍以及外向又垂皮革以防火攻列士卒於車外前行持槍楯後行持弓弩賊至令兵士上車每車載四人皆持弩車之內數十步間連六車或四車上為重樓施強弩賊至擊鼓為節以射之敵不能犯必當散去乃出騎兵擊之此中國制敵之要術也夫人

平居猶復謹藩籬固關鍵以備不虞何況當敵人之戰陣禦突騎之輕剽而無所蔽護哉夫人之被甲鎧護其身也而戰之用車亦一陣之鎧甲也夫鱗介之蟲肌肉在內鱗介在外所以自蔽豈可使肌肉居外而鱗介反在內乎夫用車以戰亦一陣之鱗介也故可以行止為營陣賊至則歛兵附車以拒之賊退則乘勝出兵以擊之用奇掩襲見可而進故出則藉此為所歸之地入則以此為所居之宅故人心有依據不懼敵騎之凌突也

又臣嘗至河北見其地勢要害必守之處者可百餘里耳北邊地勢狼山以西連山為限舊有兵寨守其險阻不必增備狼山以東至于海不過數百里皆須防禦然自易定以東有界河為阻未易涉渡獨界河以西狼山以東不過百餘里最為要害契丹所入常在此矣臣向曾上書請於此地築城以為備今城不可卒致且於其地連車橫絕之列兵守禦最便度百車可占一里以萬車相次則百里之地結而無隙矣界河以東積水之地

冬中冰合須為之備亦宜列兵車防守之又臣以為大河之北民性勁勇皆習武技國家若蠲其租賦令盡力於耕戰可以滅匈奴矣河北之民每為契丹所困者有土地不暇耕鑿有稼穡不暇收穫殺戮俘擄其辱已甚兄弟父子流離絕域人人於敵有不共戴天之仇但無路自奮耳今國家若除其戶稅使專耕戰以自給藉其防守假以甲兵下一制以喻其意云敵人殘暴甚矣今使汝執兵守禦自防其家則人必感悅思自為戰如此

則勇氣必倍而契丹可平矣戍兵既多則可減官軍西
討繼遷諸道並進窮其巢穴可一舉而定則邊境以安
天下無事矣近者北敵折衄天兵振蕩匈奴必當逃遁
繼遷必當沮喪以此取之計之上也若繼遷退伏沙漠
窮追不獲游魂假息猶為後患臣謂宜通西域之地以
助靈武之勢可以掩其不意以靜邊塵宜遣使喻秦以
西諸戎結其歡心令為前驅指導斯不難矣夫蕃戎靡
不貪慕財賄國家誠不愛重幣珍玩以啗之爵賞榮耀

以誘之則西戎宜其為用矣古人云以蠻夷伐蠻夷計之上者也宜示之以中國強盛喻之以中國富厚待之以至誠臨之以威衆夷落其敢不從服哉其有善水草之地或開屯田或置城邑若漢之置都護所謂斷匈奴之右臂如此則靈武不憂匱乏繼遷不足殄滅撫諸戎而啓西夏以平蕩逋寇此亦帝王之美略若臣所獻車戰但平易之地則可為之不獨北邊也疏奏上稱其博瞻甚嘉納之命西上閣門使孫全照太子中舍判鹽

鐵勾院張舒往河北計度公事

全照方進子方進見建隆二年

癸未開封府言民張永清自濟源詣京師市藥至圃田東有老人付以書倏忽不見啓視乃得金牌有趙為君萬年字上疑其詐令詢所獻之由永清貧窶一山叟耳略無所求即遣還鄉里

甲申撫水蠻酋蒙頂等六十五人來朝輸兵器百七十事賜賚有差

丁亥幸龍圖閣召近臣觀太宗御書及古今名畫御崇

和殿閱張去華所著元元論及國田圖謂近臣曰經國之道必以養民務穡為先朕嘗冀邊鄙稍寧兵革粗息則可以力行其事使吾民富庶也

庚寅上畋于近郊

癸巳撫水蠻酋蒙虔瑋等來朝輸兵器四百事

甲午詔西番諸族有能生擒李繼遷者當授節度使賜銀綵茶六萬斬首來獻者授觀察使賜物有差龜茲

國遣使來朝貢

按國史但有回鶻傳無龜茲傳會要云或稱西州回鶻或稱西州龜茲又稱龜

茲回統其實一也龜茲回統之別種也居西州或稱西州回鶻是年西州回鶻可汗王祿勝遣曹萬通來朝貢事在夏四月國史載之回鶻傳而會要列於龜茲卷中大抵一事也不知此所稱龜茲遣使來朝貢者即曹萬通或別一人然國史會要皆不別載恐實錄繆誤重出未可據也姑存之俟考

十二月丁未詔益利彭州戍兵謀亂既伏誅除亡命徒黨見行追捕外其餘一切不問又詔西川諸州長吏嚴察細民敢有訛言動衆情理切害者斬訖以聞先
是邊臣請城綏州大屯兵積穀以遏党項朝臣互執利害久而未決詔中書樞密院會議而呂蒙正王旦王欽

若以為修之不便李沆言修之便但恐勞民向敏中周
瑩王繼英馮拯陳堯叟皆曰修之便上以境土遐邇不
可遙度其事乃命比部員外郎直史館洪湛侍禁閣門
祇候程順奇同往按視焉

程順奇
未見

上用吳淑議遣使諭秦隴以西諸戎使攻李繼遷如京
副使宋沆剛率喜談兵事先自太子中允換秩癸丑以
沆為西京安撫使太常丞直集賢院梅詢亦屢上書論
西邊利害且自請使博囉齊乃命詢副沆焉

甲寅遣司封郎中樂崇吉侍禁閤門祇候郭盛巡撫荆

湖路

盛載弟或別一人當考
又或見祥符五天禧二

乙卯工部侍郎致仕朱昂獻所著資理論論時政賞罰
得失且言天下至廣宜急擇賢才以張治具儻限以常
謀則英俊無由自達矣上曰昂已退居復貢直言亦可
嘉也命以其書付史館仍錄一本留中

蓬州部送叔賊王洪雅赴闕途中守者皆亡洪雅獨詣
闕自訴上曰此畏法者也庚申特命釋之上始即位

之二年棄鎮戎軍不守洛苑使李繼和固請復城之乃命版築即以繼和知軍事兼渭儀都巡檢使張齊賢經略陝西因訪繼和邊事繼和上言鎮戎軍為涇原儀渭北面扞蔽又為環慶原渭儀秦熟戶所依正當輝和爾西涼六谷密本伽裕勒馬臧梁家諸族之路自置軍以來克張邊備方於至道中所葺今已數倍誠能常用步騎五千分守鎮戎及涇原州緩急會于此軍并力擊賊盖當賊來要口若防守得宜賊必不敢過此軍則緣邊民戶

不廢耕織熟戶老幼有所藏匿此軍果廢則過此新城止皆廢壘有數路來寇若自隴山下南去則由三白堡入儀州制勝關自瓦寧路南去則由彈箏峽入渭州安國鎮自青石嶺東南去則由小盧大盧潘谷入潘原縣若至潘原西則入渭州東則入涇州若自青石嶺東公主泉南去則由山東寨故彭城西並入原州其餘細路不可盡數如以五千騎令四州各為備禦不相會合則兵勢分而力不足禦矣若但將可惜之地為賊所攻便

思委棄以為良策是則有盡之地不能供無已之求也
臣慮議者以調發芻糧擾民為言且此軍所費止出四
州地里匪遙輸送甚易又劉綜方為屯田屯田若成入
中有備則四州稅物亦不須得自官軍瀚海失利賊愈
猖狂羣蕃震懼絕無鬪志兼又棄鎮戎不守繼遷往來
侵掠軍界蕃族南至渭州安國鎮北三十里至南市界
三百餘里便於蕭關屯聚萬資密補西舒等三千以脅
原渭靈環熟戶當時族帳謀歸賊者甚多賴聖謀深遠

不惑羣議復置此軍一年以來羣蕃咸已安集邊民無復愁苦以此校之則存廢之說相去萬倍矣又靈州遠絕居常非有尺布斗粟以供王府今關西老弱疲苦轉餉所以不可棄者誠恐滋大賊勢使繼遷西取秦界之羣蕃北掠回鶻之健馬長驅南牧何以支吾昨朝廷訪問臣送芻糧道路臣欲自蕭關至鎮戎城寨四州就胡蘆河川運送但恐靈州食盡或至不守清遠固亦難保青岡白馬冒足禦扞則環州便為極邊若賊從蕭關武

延石門路入縱鎮戎有五六七千兵亦恐不敵即回鶻
西涼路亦斷絕伏見咸平三年詔書緣邊不得出兵生
事蕃夷蓋謂賊如猛獸不拂其心必且不動臣愚慮此
賊他日愈熾不若聽驍將銳旅屢入其境彼或聚兵自
固則勿與鬪妖黨才散則令掩擊如此則王師逸而賊
兵勞賊必內離然後大舉又靈州孤壘戍守者最為勞
苦望比他州猶加存卹且守邊之臣內憂家室之窘乏
外憂姦邪之憎毀憂家則思為不廉憂身則欲為退迹

思不廉則官局不治思退迹則庶事無心欲其奮不顧身令出惟行不可得也良由賞未厚恩未深賞厚則人無內顧之憂恩深則士有效死之志古之帝王皆懸爵賞以拔英俊卒能成大功大凡君子求名小人徇利臣為兒童時嘗聞齊州防禦使李漢超守關南齊之屬州錢七八萬貫悉以給與非次賞賚又動及千萬漢超猶私販榷場規免商算當時有以此事達於太祖者即詔漢超私物所在悉免關征故漢超居則營生戰則誓死

資產厚則有以繫其心必死戰則動必有成績故畢太祖之世一方為之安靜方今如漢超之才固亦不必苟能用皇祖之遺法選擇英傑使守靈武高官厚賞不吝先與往日留半俸給其家半俸資其用然後可以責廉潔之節保必勝之功也又戎事內制或失權宜漢時渤海盜起龔遂為太守尚聽便宜從事且渤海漢之內地賊盜國之饑民况靈武絕塞西鄙強戎又非渤海之比苟許其專制則無失事機縱有營私冒利民政不修亦

乞不問用將之術異於他官貪勇智愚無不皆錄但使
法寬而人有所慕則久居者安心展體竭材盡慮何患
靈武之不可守哉又朝廷比禁青鹽甚為允愜或聞議
者欲開其禁且鹽之不入中土困賊之良策也今若謂
糧食自蕃界來雖禁鹽不能困賊此鬻鹽行賄者之妄
談也蕃粟不能入賊境而入于邊廩其利甚明況漢地
不食青鹽熟戶亦不入蕃界博易所禁者非徒糧食也
至於兵甲皮幹之物其名益多以朝廷雄富猶言摘山

煮海一年商利不入則或闕須況蕃戎所賴止在青鹽
禁之豈不困哉望固守前詔為便

壬戌陝西轉運使太常博士劉綜等上言護塞之方有
備為最强兵之術足食居先今李繼遷內蓄姦謀外示
柔順嘯聚兇黨侵擾邊陲為害已深逋誅已久陛下納
謀臣之議建鎮戎軍城控夷落衝要屯兵且衆饋供實
繁若輸送原渭夏秋之賦則地遠民勞儲須必窘若止
資入中茶鹽之利則物價湧貴費用滋大臣昨因按部

頗見事宜且鎮戎軍即古之原州本有四縣餘地尚存
自唐至德之後內寇屢興邊防失守所以吐蕃結贊乘
隙猖狂攻陷關內及隴右百餘城其後宰相元載決欲
城其地而守之為議者所阻今朝廷果復創置乃見元
載昔謀行之於聖代矣然既置城壘必屯甲兵既屯甲
兵必藉儲廩臣等昨閱視本軍其川原甚廣土地甚良
若置屯田厥利實博蓋鎮戎軍一歲約給芻糧四十餘
萬約費茶鹽五十餘萬儻更令遠郡輸送則其費益多

臣請於軍城四面置一屯田務開田五百頃置下軍二千
人牛八百頭以耕種之又於軍北及木峽口軍城前
後各置堡塞使其分居無寇則耕寇來則戰仍請就命
知軍李繼和為屯田制置使令繼和擇使臣充四寨主
管五百人即充屯戍則每歲所費可出於茲行之累年
必有成績矣疏奏上嘉納之

鎮戎軍之復久矣實錄乃
於壬戌始書復鎮戎軍誤

也今削去但取李繼和
本傳所載附壬戌前

丙寅撫水蠻酋蒙瑱等五十人來朝輸兵器百八十三

事

丁卯詔緣軍興令三路都部署兼河北轉運以給糧道
今敵人遁去宜即罷之 時靈州孤危詔羣議棄守之
宜知制誥楊億即日奏疏曰臣嘗讀舊史見漢北築朔
方之郡平津侯諫以為罷敝中國以奉無用之地願罷
之上使辯士朱買臣發十策以難之平津不能對臣以
為平津漢之賢相深明經術習知利害屬武帝以雄侈
自任志在開拓買臣等以詞辯獲進並侍左右前史又

稱平津每朝會議論但開陳其端使人主自擇不敢面
折廷諫由此言之非不能折買臣之舌蓋所以將順人
君之意耳築朔方非便有自來矣且地在要荒之外固
聲教不及元朔中大將衛青攘却匈奴取其河南之地
列置郡縣今靈州是赫連昌地後魏置州蓋朔方之故
墟匈奴之舊壤僻介西鄙邈絕諸華數百里之間無有
水草烽火不相應亭障不相望當邊境謐寧羗戎即叙
道路不壅饗饋無虞猶足以張大國之扞蔽自繼遷作

梗邈邑屢驚雜虜為其脅從兇黨因而猖熾待之以爵
賞頗驕蹇而不恭討之以甲兵又遁逃而無獲凡有羸
糧之後必興狙擊之謀每至靈武轉輸大須發卒防援
離去內郡皆無關心經涉畏途多有菜色自曹光實白
守榮馬紹忠及王榮之敗資糧靡屨所失至多將士丁
夫相枕而死以至募商人入穀輸帛賞以數倍之價復
於積石孤壤別築清遠一城邊城繹騷國帑匱乏既不
能制黠敵之死命又不能救靈武之爭心雖數年之間

兇黨逾盛靈武危堞歸然僅存河外五城繼聞陷沒但
堅壁清野坐食糗糧閉壘枕戈苟度朝夕且使繼遷橫
行沙漠俶擾邊陲擊列陣之戍兵侵屬國之蕃部雖有
警急無候望而誰知縱或憑陵但繕完而自保未嘗出
一兵馳一騎敢與之校此靈武之存無益明矣平津所
言罷敝中國以奉無用之地正為今日也臣以為存之
有大害棄之有大利且如國家募人入粟償以十倍之
直發卒轉送涉茲不毛之地比古之所謂率二十鍾而

致一石驅民於死者也今棄之即可以歲省戍卒分守
內郡一卒之費可給十夫國家無飛芻輓粟之勞士卒
免暴露流離之苦必謂廢之則虧失土地傷損威重且
如堯舜夏禹聖之盛者也地不過數千里而明德格天
四門穆穆武丁成王商周之明主也地東不過江淮西
不過氐羗南不過荆蠻北不過太原而頌聲並作號為
至治及秦漢拓土窮兵遠畧雖疆理益廣而干戈日尋
府庫之資屢空生靈肝腦塗地校功比德豈可同年而

語哉夫蝮蛇螫手壯士斷腕蟻壤不塞將漏山河今靈
武之存為害甚於蝮蛇供饋之費為蠹逾於蟻壤無鴻
毛之益有太山之損豈可忽遠大之略信悠悠之談昔
西漢賈捐之嘗建議棄朱崖當時公卿亦有異論元帝
能排衆多之說奮獨見之明下詔廢之人懷其德元帝
之意寧欲自棄其地當其內屬為郡固已置吏而撫循
及其稱兵搆亂豈可勞民而征戍故其詔書曰議者以
棄朱崖羞威令不行夫通乎時變則憂萬民萬民之饑

餓危孰甚焉且宗廟之中凶年不備况乎避不嫌之辱
哉臣以正與今日靈武之事相類必以失地為言即幽
薊八州河湟五郡所失多矣何必此為議者又以西北
諸蕃戎馬是產資其控制以通貿易環慶諸州內附蕃
落藉其屏翰以免繹騷此迂濶之甚且戎人為利所誘
故互市於邊關蕃部之屬自強故能庇於種類必來寇
於環慶固無隔於藩籬百雉危城千里阻隔自救不暇
豈及於他議者又謂其土田沃饒有漢陂之利恐賊遷

因而播殖益以富强况戎人但以攻剽為能罔知耕稼之事河隴之外棄地甚多延袤百城提封萬井西漢屯田之所疆畔猶存儻事力耕可以積穀何必獨耕靈武乃能足食若靈武於賊有大利即是必爭之地當朝夕攻取豈至於皆為孟浪之談殊非經久之計况又歲有調發動致寇攘借寇兵而資盜糧竭民力而耗國用為患之大無出於斯雖庸人豎子亦知其可棄也若或遴選單介間道而行齋持詔書宣布王命令其盡焚廬舍

自拔而歸丁壯悉令持兵老弱以之襁負古稱歸師不
可遏又曰置之死地而後生當此之時人百其勇臨難
思免其鋒莫當又須申命偏師揚言出塞軍聲既振賊
勢自分即靈州遷民不虞邀擊之患雖有剽刼易為枝
梧且國所惜者士民所急者財用豈可以驍果之旅委
餒虎之蹊府藏之殖棄廬山之壑今棄去靈武退守環
慶卒免戍於絕域民斯保其室家供饋不出於郊圻恩
澤自淪於骨髓民力不竭士氣益揚何敵不摧何戎不

克陛下又憤茲黠賊志欲剪除臣以為不可黷武以窮
兵止可伐謀而制勝臣料賊遷盱眙邊塞之外倔强沙
漠之中脅制諸羌嘯聚不逞無耕農之業無蠶織之功
為鼠竊之謀以資衣食聚烏合之衆以撓塞垣致蕃夷
之服從用兇威而馳迫非有厚利能誘其人廢棄靈州
每歲更無饋運絕其覲望何所窺圖平夏之西鹽池斯
在先是貿易粟麥用資餽糧今條禁甚嚴法網尤密無
敢逾越漸致攜離皆困賊遷之術也臣竊見太祖朝姚

內斌領慶州董遵誨領環州二人所統之兵才五六千而已閫外事一以付之軍市之租不從中覆用能士卒致命羗戎畏威朝廷無旰食之憂疆場無羽書之警臣欲望於武臣中選有將帥之才知邊鄙之事者三數人各部諸郡量其所將兵多少除廩祿之外賜一大縣租賦恣其犒設令開幕府召髦俊為僚佐咨以策略勇力之士稟其指蹤之用軍旅之政許以便宜而行儻賊遷侵邊郡軍城擾內屬蕃部並脣齒相援腹背夾攻或戰

馬正肥戎士思奮即召發內屬討虜生羗俘獲之餘盡
分麾下且戎人利於降附明立賞格厚答戰功即遷賊
腹心稍稍奔潰親離衆叛事去運乖勞居獨行誰與為
伍但塞外一獨夫耳安能與大邦為讎哉若欲謀成廟
堂功在刻漏臣以為此賊方黠其財猶豐不逞之羣如
臂使指未可以歲月破也直須廢棄靈州退守環慶然
後以計困之爾如臣之策祇得三兩驍將付三萬精卒
以數縣租賦給其用度分守邊郡賊遷便可計日成擒

朝廷可以高枕無事矣 陝西轉運使劉綜聞朝議欲
棄靈州奏疏曰國家財力雄富士卒精銳而未能剪除
兇惡者誠以賞罰未行而所任非其才故也今或輕從
羣議遂棄靈州是縱賊之姦計矣且靈州民淳土沃為
西陲巨屏所宜固守以為扞蔽然後於蒲洛河建軍城
屯兵積糧為之應援此暫勞永逸之勢也况鎮戎軍與
靈州相接今若棄之則原渭等州益須設備較其勞費
十倍而多則利害之理昭然可驗矣上訪於左右輔臣

咸以為靈州乃必爭之地苟失之則緣邊諸州亦不可保上頗然之宰相李沆奏曰若遷賊不死靈州必非朝廷所有上愕然曰卿何獨與衆異也沆曰臣謂莫若發單車之使召州將部分戍卒居民委其空壘而歸如此則關右之民息肩矣上又出手札訪於兵部尚書張齊賢齊賢獻疏曰遷賊包藏兇逆招納叛亡建立州城創置軍額有歸明歸順之號且耕且戰之基仍聞潛設中官全異羗夷之體曲延儒士漸行中國之風覩此作為

志實非小況靈州自遷賊為逆以來危困彌甚五鎮連陷姦威益張道路阻艱音耗迨絕當城鎮完全之日磧路未梗之時大凡中外常人言合棄者已衆矧清遠軍近遭攻陷青崗寨輒自焚燒兵勢人心傷沮數倍即今來所議棄者益多靈州斗絕一隅旁無援助南去鎮戎約五百餘里東去環州僅六七日程如此畏途不須攻奪則城中之民何由出城中之兵何以歸欲全軍民理須應接少發兵則復虞邀刼多發兵則廣費資糧與其

應以出兵冒若用奇而取勝小勝則軍民可出大勝則
形勢復全匪惟擒討之有方抑亦進退而獲利與其虛
勞甲卒枉役齊民示惡稔姦萬萬相遠也果能更益精
兵合西邊現屯田卒雜以對替之衆使其兵力有餘量
分師徒與原渭鎮戎合彼中與山西熟戶從東亦擇稔
便處入界若嚴約師期兩路齊進苟或繼遷敢來援助
彼則分兵而應敵我則乘勢而易攻且棄命道途首尾
難衛千里趨利不遁則擒臣謂兵鋒未交靈州之危自

解矣因取靈州軍民置於蕭關武延以來據險就水建一寨僑置靈州羈係蕃漢土人之心裁候平寧却歸然後縱蕃漢之兵伺便奮擊我則按重兵而觀利度賊勢以設謀臣謂破賊成功十有八九矣

閏十二月戊辰朔詔鎮定高陽關副都部署兼鎮州都部署王超赴闕命莫州都部署桑贊代之將議西討也楊瓊等獄具罪當死詔五品以上集議兵部尚書張齊賢等請如律上特赦之丁丑並除名瓊流崖州潘璘康

州李讓馮守規瓊州張繼能儋州劉文質雷州王懷普
賀州仍籍其田宅

戊寅延州言李繼遷蕃部阿約勒等百戶來降詔給田賜
帛長吏常存撫之 博囉齊貽書李繼和言將發兵討
李繼遷願聞朝廷出師之期繼和具奏詔繼和諭博囉
齊宜整旅以俟師出即往報

壬午靈州言河外寨主李瓊等以城降賊其親屬當緣
坐上曰窮邊孤壘又無救助力屈就擒此可憫也並釋

之

乙酉延州言繼遷蕃部瑚葉實普密額珠等首領率屬
歸附詔擇善地處之常切存撫

洪湛等使還言城綏州其利有七而害有二丙戌築綏
州城

丁亥以六宅使順州刺史康延英為永興軍鈐轄率禁
軍步騎五千屯於京兆令知軍府事雷有終同主之將
大舉援靈州故益兵為聲勢也契丹閤門使寇師子

用和繼忠來降以用和為三班奉職繼忠補外州鎮將
時又有李紹隆者來降亦授三班奉職御史臺上言
舊例假三日羣官並赴文德殿橫行朝參近日多以內
殿起居不赴望申舊制以肅朝儀詔自今並許彈奏
戊子鎮戎軍言涼州貝寧族首領格埒班珠爾歸附仍貢
名馬自稱有精騎三萬願備驅策有詔慰獎厚償其馬
直知靜戎軍王能言本軍鮑河自姜女廟以東水極
深濶其狹處不過三四里今歲敵騎不能踰越而南侵

者亦限此水故也今請於本軍之西姜女廟東決北流入閭臺淀復於軍東塞之使北流三臺小李村其水溢入長城口而南流若發三二千人塞其口俾自長城北而東入於雄州則猶可以隔限敵騎計其功五日可畢上曰朕觀人畫圖鮑河之北至閭臺淀地形稍高必通流不遠同知樞密院事馮拯陳堯叟曰臣嘗奉使至彼目驗地形實如聖旨乃詔除閭臺淀地高不可決北流外餘從所請

景德元年六月耿
斌所言與此相闕

庚寅上以河北饑豆粟踴貴出麻滓遂實示宰相曰民食此矣即令蠲秋賦罷官糴又手詔停三路排陣押陣使減戎馬饋餉之役分遣知制誥梁顥薛映供備庫副使潘惟吉西京左藏庫副使李漢贄等往西路發倉廩賑流民以便宜從事漢贄漢瓊之弟也又詔河北富人能發私廩救饑民者第加恩獎

甲午以馬步軍都虞候王超為西面行營都部署環慶路部署張凝副之入內副都知秦翰為鈐轄領步騎六

萬以援靈州上問超計策超上二圖其一置資糧在軍中布兵周防賊無以鈔略其一遇賊即變而為方陣陣形之外分列游兵持勁弩賊至則易聚而并力圖頗采李靖輜重法上甚獎之

明年正月己未超乃赴屯所

時宋沆等未行

上謂宰相曰朕觀盟會圖頗記吐蕃反覆狼子野心之事今已命王超等出師若難為追襲即靈州便可制置沆等不須遣止走一使以會兵告博囉齊可也

是歲募河北民諳契丹道路勇銳可為間伺者充疆人

置都頭指揮使無事散處田野遇敵入寇追襲給器甲口糧加以食錢遣出塞偷斫賊壘能斬首級奪馬者如

賞格擄獲財畜皆畀之

此據兩朝兵志

